


FLOR DI PALISIA

Dunando muestra loke ta parti di nos cultura

ORANJESTAD(AAN)- Pa mas cu 15 aña caba e grupo Flor di Palisia, consistiendo di nos grandinan ta dunando presentacionnan di locual ta parti di nos bailenan tipico. E grupo aki cu ta consisti di 6 pareha a baila na diferente lugarnan den exterior y na Aruba mes pa asina muestra nan stimacion na nos pais y tambe pa involucra e ritmo folklore den e futuro generacion.

Den un entrevista cu DIARIO a tene cu Sr. Marcial Kock di e grupo Flor di Palisia el a conta cu el a lanta e grupo cu ningun intencion pa gana placa sino pa e parti folklore di nos pais no bay perdi.

Na aña 1979 e Flor di Palisia a presenta pa promer biaha den Cas di Cultura hunto cu varios otro grupo tipico mas, pero e unico cu a keda te awor ta Flor di Palisia.



For di e tempo ey e grupo a sigui baila den diferente distrito na Aruba, sea ta pa ocasionnan especial of pa

shownan cultural.

Segun Sr. Kock e bailenan di e grupo nan ta mantene na e bailenan tipico y na e manera di baila di antes, esta cu ora bo ta lanta un hende pa baila bo ta bay pidie si e por baila y na final ta hibe na su stoel bek. No manera awendia ta grita un mucha muher of ta haci un seña for di leu caba pa pidi un mucha muher pa baila.

Te cu aña pasa un di e parehanan pa motibo di enfermedad y edad no por a sigui mas cu e grupo. Tambe esposa di Sr. Kock pa motibo di enfermedad no por sigui, pero un di su yiunan a dicidi di sigui e paso di su mayornan y awor ta pareha di su tata na momentonan di bay baila.

E grupo a yega di baila entre otro pa e grandinan cu no por cana na San Nicolas y tambe dia cu La Reina a bishita Aruba nan a duna un presen-



tacion ariba Plaza Betico. Pafor di Aruba e grupo a yega di presenta 2 biaha na Maracaibo, un ariba invitacion di Gobernador di Maracaibo, 1 biaha na Punto Fijo y 1 biaha na Coro na ocasion di e bicentenario di nacimiento di

Libertador Simon Bolivar.

Tambe ariba barconan di turista Flor di Palisia a yega di presenta caminda nan a bay cu caha di orgel pa duna nan presentacionnan.

Trahe di e grupo ta algo tipico cu segun por a compronde ta mas di 230 aña bieu.

Sr. Kock actualmente ta dunando les tur Diadomingo mainta na School di Arte na San Nicolas, pero di parti di e futuro generacion ta muestra masha poco interes den locual ta nos folklore.

E temponan aya, Sr. Kock ta conta, tabata tin masha poco fiesta, y manera tende zonido ta busca ta di unda e ta bini y pa busca manera di bay. Tabata temponan dushi y alegre.

Awendia Sr. Kock ta bisa, cu tin hopi di e grandinan no ta bay fiesta mas, ya cu ora di bay un fiesta cu nietonan, e desorden cu e ritmonan ta haci y e manera di baila no ta pa e grandinan mas. Hopi ta esnan cu ta prefera di keda cas, cu mester bay un lugar caminda desorden y e manera informai di baila ta molestia nan.

DIARIO ta felicita Sr. Kock cu ta contando cu 78 aña di edad y cu pa añas largo a tuma un parti di nos cultura na pecho, ya cu segun Sr. Kock mas di 3/4 di nos valornan cultural a bay perdi, y ta spera cu e lo por sigui pa hopi tempo mas pa asina e parti di nos folklore tambe no bay den olvido.



DIA DI HIMNO Y BANDERA STIMA (Cancion)

Awe hunto nos tur ta celebra
dia di himno y bandera stima
nos ta come ta hunga y haci pret
toca caha wiri y trompet


Nos ta canta ta baila y yongota
te anochi cu nos ta bon cansa
canta himno pa nos tur recorda
nos Aruba semper tan stima

2x

Nos bandera ta bunita di berdad
simbolonan di union y libertad
cu gran amor nos lo sigui aprecie
y te na morto nos lo defende

(Esaki ta un cancion cu Sr. Chomi Lacle adapta for di un wals y a trahe especialmente pa su nietonan canta dia 18 di Maart. E ritmo ta masha bunita mes y ta di spera cu e lo por haya un acogida tambe cerca muchanan di school pa asina nan por siña un cancion pa dedica na nos dia di Himno y Bandera).

18 Maart Dia di Himno y Bandera Aruba pabien...



**Aruba Farm
Supply**

